

**LINANGKOB NGA HISGOTANAN:
ANG DIOSNONG PAGPAAMBIT SA DIOSNONG TRINIDAD
ALANG SA DIOSNONG PAMATIGAYON**

Mensahe 4

Magsinati sa Diosnong Pagpaambit sa Diosnong Trinidad sa Paginhawa Nato sa Espiritu, Pag-inom sa Tubig sa Kinabuhi, ug Pagkaon sa Tipanay sa Dios

Basahong Kasulatan: Juan 20:22; 6:33, 57; 1 Cor. 10:3-4; Bug. 2:7, 17; 3:20

I. Giginhawa sa Anak ngadto sa mga tinun-an diha sa pagkabanhaw ang nahingpit nga Espiritu nga balaang gininhawa—Juan 20:22:

- A. Gipadayag sa Ebanghelyo ni Juan nga nahimong unod si Cristo aron mahimong Cordero sa Dios ug nga sa pagkabanhaw nahimo Siyang Espiritung taghatag-og-kinabuhi; busa, sa pagkabanhaw Niya giginhawa Niya ang Iyang Kaugalingon isip nahingpit nga Espiritu ngadto sa mga tinun-an—1:29; 20:22:
1. Ang Espiritu Santo sa 20:22 mao ang Espiritu nga gihulat sa 7:39 ug gisaad sa 14:16-17, 26; 15:26; ug 16:7-8, 13; nagpakita kini nga ang pagginhawa sa Ginoo sa Espiritu Santo ngadto sa mga tinun-an mao ang katumanan sa gisaad nga laing Maglilipay.
 2. Ingon nga Espiritu giginhawa Siya ngadto sa Iyang mga tinun-an, nga makapuyo Siya diha sa mga tinun-an ug makakinabuhi sila pinaagi Niya ug uban Niya, ug makapabilin Siya kanila ug makapabilin sila Kaniya—20:22; 14:19-20; 15:4-5.
 3. Sa pagginhawa Niya sa Espiritu ngadto sa mga tinun-an, gipaambit ni Ginooong Jesus kanila ang Iyang Kaugalingon isip kinabuhi ug tanan.
 4. Ang Espiritu Santo sa 20:22 mao gyod ang nabanhawng Cristo mismo, kay gininhawa man Niya kining Espirituha; busa, ang Espiritu mao ang gininhawa sa Anak.
- B. Ang Ginoo mao ang Espiritu nga naghatag og kinabuhi, ug kining Espirituha ang gininhawa nato—2 Cor. 3:6, 17; Juan 20:22:
1. Ang Pulong, nga mao ang Dios, nahimong unod aron mahimong Cordero sa Dios, ug sa pagkabanhaw nahimo Siyang balaang gininhawa nga mahanggap nato—1:29; 20:22.
 2. Naa nato karon si Cristo nga Pulong, Cordero, kahoy, ug gininhawa: alang sa pagpadayag ang Pulong, alang sa pagtubos ang Cordero, alang sa pagpaambit og kinabuhi ang kahoy, ug alang sa pagkinabuhi nato ang gininhawa—1:1, 29; 10:10b; 14:19; 15:1.
- C. Ang nahingpit nga Espiritu nga gininhawa maoy tanan alang nato sa pagkinabuhi nato sa Cristohanong kinabuhi; ang gininhawa ray ma-Cristohanon, ug ang gininhawa ra, ang Espiritu, ang mahimong mananaog—Gal. 3:2-3, 14; Fil. 1:19; Bug. 2:7.

II. Kon buot tang makasinati sa diosnong pagpaambit sa Diosnong Trinidad, moinom gyod tang tanan sa mao ra nga espirituhanong ilimnon, ni Cristo nga malangkobon-sa-tanan nga Espiritung taghatag-og-kinabuhi—1 Cor. 10:3-4:

- A. Ang espirituhanong ilimnon sa 1 Corinto 10:4 nagpasabot sa buhing tubig nga niagay sa napikas nga bato; naghulagway kining batoha sa gilansang sa krus ug nabanhaw nga Cristo, ug naghulagway kining tubiga sa Espiritu nga malangkobon-sa-tanan nga ilimnon nato—Exo. 17:6; Juan 7:37-39; 1 Cor. 12:13.

- B. Ang espirituhanong ilimnon, ang buhing tubig, mao ang tubig sa kinabuhi nga naa sa pagkabanhaw; moinom ngani ta sa tubig sa kinabuhi nga naa sa pagkabanhaw, mahimo tang mga tawo nga naa sa pagkabanhaw ug iya sa pagkabanhaw—10:4; Juan 14:20; 2 Cor. 1:9.
- C. Sa pag-inom nato ni Cristo nga Espiritung taghatag-og-kinabuhi, giuol sa Dios ang Iyang Kaugalingon kanato, kay sa pag-inom gipasulod man nato ang Ginoo, ug organico Siyang nausa nato aron mahimong atong kinabuhi ug bahing nag-uol nato—1 Cor. 10:4; Col. 3:4, 10-11.

III. Ang pamatigayon sa Dios mao nga mokaon ta ni Cristo nga tinapay sa Dios ug maumol Niya aron magpadayag Niya ug morepresentar Niya—1 Tim. 1:4; Juan 6:35, 41, 57; Gen. 1:26:

- A. Ang walay kataposang pamatigayon sa Dios paghimo man sa tawo nga sama Niya sa kinabuhi ug kinaiya apan dili sa ranggo sa pagka-Dios; mahimo tang Dios sa kinabuhi ug kinaiya sa pagkaon nato ni Cristo nga tinapay sa Dios—Juan 6:33.
- B. Ang tuyo sa Dios sa pamatigayon Niya pag-uol man sa Iyang Kaugalingon kanato ug pag-usab sa atong pagkamao sa pag-usab Niya sa atong pagkaon ug pag-pakaon kanatog Cristo nga langitnong kalan-on—Exo. 16:14-15; Juan 6:27, 32, 35.
- C. Gipadayag sa Juan 6 si Cristo nga tinapay nato—ang langitnong tinapay, ang tinapay sa kinabuhi, ang buhing tinapay, ang tinuod nga tinapay, ug ang tinapay sa Dios—vv. 32-33, 35, 41, 48, 50-51.
- D. Gusto ni Ginoong Jesus nga kan-on, hilison, ug ihilis-sagol nato Siya nga tinapay sa Dios, tinapay sa kinabuhi, ug buhing tinapay—vv. 33, 35, 51:
 - 1. Ang tinapay sa kinabuhi mao ang sangkap sa kinabuhi nga pormag kalan-on—v. 35.
 - 2. Nagpasabot *ang tinapay sa kinabuhi* sa kinaiya sa tinapay, nga kinabuhi; nagpasabot *ang buhing tinapay* sa kahimtang sa tinapay, nga buhi—vv. 35, 51.
- E. Ang pamatigayon sa Dios may kalabotan ni Cristo nga nisulod nato; alang niini, dawaton gyod nato si Cristo pinaagi sa pagkaon Kaniya—Efe. 3:17a; Juan 6:57:
 - 1. Ang rekord kalabot sa espirituhanong pagkaon sa Biblia nagpadayag nga tuyo sa Dios nga ipaambit ang Iyang Kaugalingon kanato pinaagi sa pagkaon—v. 57; 1 Cor. 10:3; Bug. 2:7; 22:14.
 - 2. Ang pagkaon pagkontak mag mga butang sa gawas nato ug pagpasulod niini kanato, ug ang resulta mao nga mahimo kining pagkamao nato—Gen. 2:16-17.
 - 3. Ang pagkaon nato ni Ginoong Jesus pagdawat man Kaniya nganhi nato aron mahilis-sagol Siya sa gipanganak pag-usab nga bag-ong tawo sa paagi sa kinabuhi—Juan 6:56-57.
 - 4. Ang pagkaon maoy paagi nga masinati nato ang pagpaambit sa Dios aron mapadayag ug marepresentahan Siya—Gen. 1:26; 2:9; Juan 6:51a, 53-57.
 - 5. Ang kalan-ong gikaon, gihilis, ug gihilis-sagol nato mahimo gyong kita; may kalabotan kini sa panagsagol—1 Cor. 10:17.
 - 6. Ang pagkausang gitinguha sa Dios sa tawo gihulagwayan sa mahitabo sa dihang kan-on, hilison, ug ihilis-sagol nato ang pagkaon—Juan 6:57.
 - 7. Mahimong kita ang gikaon nato; busa, kon mokaon ta ni Cristo nga tinapay sa Dios, mahimo tang Dios sa kinabuhi ug sa kinaiya apan dili sa ranggo sa pagka-Dios.
- F. Matod pa sa pulong sa Ginoo sa Bugna 2 ug 3, gipahiuli na ang mga mananaog sa hustong pagkaon sa Ginoo nga ilang sangkap nga kalan-on; gikaon nila Siya dili lang ingon nga kahoy sa kinabuhi ug tinagong manna kondili kombira sab nga tugob sa Iyang kadato—2:7, 17; 3:20.